



EM 2018/50

EM 2018/79

22/10-2018

Randi Vestergaard Evaldsen

Aningaasarsiaqartitaaneq pillugu inatsisip ilaasortaajunnaarnersiutisiaqartarnermut malittarisassartaasa allangortinnissaanut siunnersuuteqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasilluni ilaasortaajunnaarnersiutisiaqarnerup nalaani akissarsiat tamarluinnaasa ilaasortaajunnaarnersiutisianit ilanngaatineqarsinnaangorlugit.

(Inatsisartuni ilaasortaq Niels Thomsen, Demokraatit)

(Siullermeerneqarnera)

Kingusinnerpaamik UKA 2019-mi aningaasarsiaqartitaanermut inatsisip allangortinnissaanut siunnersuusioqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, tassani aalajangersarneqassalluni, Inatsisartunut ilaasortat Folketingimi ilaasortaasut imaluunniit aamma kommunalbestyrelsimi ilaasortaasut aningaasarsiaat appartinneqartassasut tassani atorfirmik aappaani aningaasarsiaasa amerlaqataannik aamma taamannak ilanngaassisoqartassasoq borgmesteritut, borgmesterilluunniit tullersortaatus atorfik eqqarsaatigalugu. Inatsit atorussangortinneqassaaq tulliani Inatsisartunut qinersisoqarneraniit.

(Inatsisartuni ilaasortaq, Tillie Martinussen, Suleqatigiissitsisut)

(Siullermeerneqarnera)

Siunnersuummi siunertaavoq Inatsisartuni ilaasortat, Folketingimi imaluunniit Kommunalbestyrelsimi ilaasortaasut atorfirmi aappaani akissarsiamik amerlaqataannik ilanngaanneqartalissasut. Allatut oqaatigalugu politikerit marloqiusamik qinigaaffillit, qinigaaffitik arlallit akissarsiaqaatiginagit, qinigaaffik ataasiinnaq akissarsiaqatigisalisagaat.

Demokraatiniit erseqqissaatigissavarput kissaatiginerpaagatsigu tamanna qinersisartut kina innuttaasunut sinnisoriumanerlugu namminneq aalajangissagaat. Tassani eqqarsarpugut qinersisartut qinersilinnginnerminni nammineq nalilersoreertaraat inuk allamik atorfeqareersoq isigissanerlugu ilaasortaaffinnik marloqiusanik suliaqarsinnaasutut.

Soorlu siunnersuuteqartup nammineq oqaatigigaa taava politikerit assigiinngitsut sulisinnaassusaat sulisarnerallu assigiinngillat. Ilaat immaqa atorfik ataasiinnaq aallusinnaasarpaat allalli arlalinnik isumaginnissinnaallutik. Suliffeqarnermi tamanna takornartaanngilaq, tassani sualummik pisortat arlariiaanik atorfeqarsinnaapput suliaqartarlutillu. Kingulliillu eqimattat eqqarsaatigalugit soorunami piumasqaataavoq sulinerunissaq amerlasuut atorfirmi suliamiluunniit suliaqarnissamut takorluugaannut naleqqiullugu. Inuit taakku suliatic naapertorlugit akissaasersorneqarput, taamaattumik aamma soorunami taamaattariaqarpoq politikerit qinikkat eqqarsaatigalugit.



Politikereqassappat qinigaaffimmi akissarsiaannarnik kajumissuseqartinneqartunik taava soorunami innuttaasut nalilerumaarpat allat sulisinneqassanginnersut. Demokratiimi tulluurtumi qinersisartut ataavartumik politikerit suliaat naammassisaallu nalilersortuartariaqarpat kingornalu qinertarlugu piukkunnarnerpaaq - taasisinnaanertik politikerimut partiimulluunniit aalajangersimasumut qilersornagu.

Demokraatiniik paasivarput innuttaasut akornanni naliginnaasumik politikerinut qularnerup saniatigut aamma isumaqartoqartartoq qinikkat akissarsiarissaartorujussuusut kiisalu politikerit naliginnaasumik inuuniutigalugu polikeriusartut.

Taamaattoqaqqajangilaq. Aap, Inatsisartuni ilaasortat akissarsiaat agguaqatigiisillugu akissarsianit qaffasinneruvoq. Imaanngilarli akissarsiaat soorlu ilinniarluarsimasut, aalisartut eqiasuitsut pikkorissullu akissarsiaannit qaffasinnerusut, namminersortut eqiasuitsut pikkorissut allallu allanit sulinerusartut akissarsiaannit qaffasinnerusut - aamma politikerit marloqiusanik qinigaaffeqarnertik pissutigalugu marlunnik akissarsiaqartut pineqaraluarpataluunniit. Allatut oqaatigalugu oqallinneq allannguallatsittariaqarpoq qinersisartut qinikkat suliaannut ilisimasaqarnerulersillugit naammassisartagaannullu - tamatumalu kingorna qinersisartut namminneq aalajangerumaarpat qinertagartik qineqqikkusunnerlugu nutaamilluunniit qinersissanerlutik.

Naggataatigut erseqqissarusupparput Demokraatiniit innuttaasut qinigassanngortikkusuttut immaqalu naggataatigut qinigaalluarunik ilaasortanngorsinnaasut inerterniannginnatsigit. Taakku akisussaaffik tigusartik suliatilluunniit naapertorlugit akissaasersorneqarumaarput.

Taamatut oqaaseqarluta immikkoortoq 79 itigartipparput.

Immikkoortoq 50

Qulequtaq una immikkoortuuvoq qinigaappaarnerma nalaani eqqartornikuusartsinnut assingusoq. UKA15-mi eqqartorparput - immikkoortoq 42, taamani siunnersuutiga akuerineqanngerujussuarpoq, itigartinneqavataarpoq. Aamma ajunngilaq, kisianni takusinnaasassitut ajornartorsiuqtip qitia suli qaangerneqanngilaq, soorlu siunnersuuteqartup oqaatigigaa. Malittarisassat atuuttut iluaqutissartaqarpallaqaat allanngortittariaqarlutillu. Eqqaamaqaara inimi maani taamani oqallinnerput. Taamani annilaanngatigineqarpoq Inatsisartuni ilaasortaajunnaarsimasut akissarsiaarutivissinnaanerat. Kisianni takuneqarsinnaasutut kikkut tamarmik assigiimmik pineqarput naak ilaasortaajunnaarnerup kingorna atorfittaartoqareertaraluartoq, taamaakkaluartorli ilaasortaajunnaarnerisutisiaqartinneqartarput qaavatigut. Allanut suliffissarsinnaanngitsunut ilaasortaajunnaarnerisutit tuttartussaapput, mannakkulli ilaasortaajunnaarnerisutisiat imatut aqqitaapput immikkoortinneqaratik illersorneqartariaqartut illersorneqartariaqanngitsullu.

Neriuppunga siunnersuut ullumi ilalernerqarumaartoq, pineqartoq iluaqutissarsiat annerpaat ilagimmassuk. Inatsisigut malittarisassagullu piviusunut naleqqussartariaqarpagut isumaqalersillugit.

Taamatut oqaaseqarlunga siunnersuut normu 50 Inatsisunut Ataatsimiititaliamut innersuuppara.